

Sa manovra finantziària rezionale

Pro sos sardos, e galu prus pagu pro sos massàjos, non sunt bonas sas noas chi arribant dae sa manovra finantziària 2012-2014 presentada dae sa Zunta Rezionale.

Pro efetu de sas manovras istatales chi minimant s'ispeza pùblica, si podet gastare meda prus pagu dinare pro su rispetu de su patu de istabilidade: 405 miliones de èuros de mancu pro su 2012 (cunforme a su 2010) e 460 miliones de èuros de mancu pro su 2013.

In su 2012 su dinare chi b'at a disponimentu cunforme a sas làcanas de su patu de istabilidade (chi non balent pro sa sanidade e pro sa cuota capitale de sos mùtuos) est de 3.452 miliones de èuros pro su chi pertocat sos impinnos e de 2.766 miliones de èuros pro su chi pertocat su gastu (cumpetèntzia e residuos, chi sunt semper aumentende e che sunt a beru tropu).

Sa diferèntzia intre impinnu e ispeza est duncas de 686 milione de èuros, chi belle de seguru non s'ant a gastare in sos annos imbenientes bidu chi b'at semper sa làcana pro sos pagamenti. Su de b'esseret tropu istantziamentos cunforme a sa possibilidade de gastu (chi oramai b'est dae su 2007) produit residuos chi no ant a bènnere mai gastados. Sighimus duncas a fàghere unu bilàntziu chi pro su 20% pagu prus o mancu non si podet gastare, ne como ne in su tempus benidore.

Pro Confagricoltura Sardinna andat bene sa politica de risanamentu de su bilàntziu rezionale chi at permittidu de minimare su dèpidu cumplessivu (disavanzu e mùtuos) dae 5.700 miliones de èuros a 2.773 miliones de èuros. Cunsiderende chi in su 2012 no si prevedet de fàghere àteros mùtuos, pro su 2011 b'at a àere unu disavanzu de 800 miliones de èuros.

Su bilàntziu rezionale dipendet finas dae comente at a andare sa cuntierra pro sas intradas, chi non daet seguresa subra su dinare chi b'at a beru. In sas intradas chi sa Rezione ponet in su bilàntziu 2012 b'at finas cussas chi diant dèpere arribare dae sa cuntierra cun s'Istadu chi però no est galu issirrinida. A pàrrere de Confagricoltura est zustu a pònnere custas intradas in su bilàntziu ma a su matessi tempus cheret a dare cara a comente impreare custu dinare (finas a 800 miliones de èuros) chi s'Istadu diat pòdere cuntestare.

Àtera chistione de importu est cussa de meorare s'ispeza sanitària chi est sighida a aumentare e est prus de su 54% de su bilàntziu rezionale. A pàrrere nostru cheret a vardiare su bilàntziu de sa sanidade chi sindacas arriscat de isconzare de su totu su bilàntziu rezionale.

Pro su chi pertocat sa massaria in sa proposta de sa Zunta Rezionale b'at meda prus pagu dinare.

Finas cunsiderende sas manovras istatales chi ant minimadu s'ispeda pùblica e cumprendende chi b'at bisonzu de segare in unu mamentu de crisi manna chi òbricat a totus a fàghere sacrificizios, su

minimozu de su dinare pro sa massaria (chi est belle de 55 miliones de èuros, si colat difatis dae 245 miliones de èuros pro su 2011 a 190 miliones de èuros pro su 2012) non nos acumentat.

Sa *funzione obiettivo 4 - Filiere agroalimentari* colat dae 219 miliones de èuros pro su 2011 a 161 miliones de èuros pro su 2012, cun unu minimozu de 58 miliones de èuros. Pro su tempus benidore paret galu pejus ca pro su 2013 si prevident 140 miliones de èuros e pro su 2014 138 miliones de èuros.

Non nos podet acumentare ca dae annos semus narende chi in su bilàntziu agrìculu b'at finas su dinare pro sas Azzentzias e pro sos Consòrtzios de bonifica chi si nche pigant belle s'80% de su dinare.

Non si cumentat su minimozu chi, comnete amus naradu, cunsiderende sas manovras istatales bi podet finas istare; no andat bene chi si dae s'ispeza pro sa massaria nche dogamus su chi si pagat pro su personale, pro sos investimenti de sa massaria abarrant su 0,58% ebia de su dinare chi ba't in totu sa Finantziària.

Su minimozu de 55 miliones de èuros ponet una làcana manna a sos investimenti, difatis si in su 2011 s'ispeza pro sas Azzentzias e sos Consòrtzios de bonifica fiat prus pagu de su 63% de totu s'ispeza agrìcula, in su 2012 imbetzes est prus de su 77%.

Custu cheret nàrrere chi sas ispesas pro su personale abarrant firmas e minimat imbetzes su tantu de dinare pro sos investimenti e difatis su dinare de s'Assessoradu a s'Agricoltura chi si podet a beru gastare in su 2011, est pagu prus de 40 miliones de èuros.

Confagricoltura Sardinna torrat a nàrrere chi su dinare pro sas Azzentzias e sos Consòrtzios de Bonifica, nessi cussu pro su personale, non cheret postu in su bilàntziu agrìculu. Cussu dinare diat dèpere èssere postu paris cun sas ispesas pro su "Personale e funtzionamentu de s'amministrazione rezionale".

Sa manovra at istramudidu de su totu sa Leze 15/2010 mescamente in cussos interventos de bundu chi bisonziant pro fàghere torrare a mòere s'economia agrìcula sarda e chi aiat dadu un'isperu a sos massajos e pastores sardos.

Ch'ant segadu unu muntone de dinare, ant gastadu pagu, ant praticadu petzi pagos artìculos e sos residuos che sunt zai medas.

A nàrrere sa zusta est tropu cunsiderende chi sa massaria no at una leze de setore.

Sa massaria est in dificultade manna, s'isetat meda dae sa politica, ma si sos nùmeros sunt custos galu una borta non b'at a àere imposta bona pro sos isetos de massajos e pastores.